

Entre las pèiras

Enclaustrada dins la capeleta
De Nòstra Dòna, dins la glèisa
Laissi volar mon esperit
Al delà del temps e del mond estiquit
Al segle onzen me passeji
Entre las pèiras del castel d'Aumelas vivi
Sus las piadas de Raimbaut d'Aurenja camini
Jògui amb los mots e
« Ar resplan la flor enversa »
Que me soi virada cap a l'edat mejana,
Careçant la pèira blanca romana, me remembri
la seda, lo velós del vestit de las dònas, de las Nòstras Dònas
E ar resplan la flor enversa

La Carrièra

Dins la carrièra
Dins l'escuresina
Una ombra se passeja

Gaiti
De ma fenèstra
Entrevèsi

D'òmes
Coneguts
Desconeguts
Tuaires

Ausissi
De bruches
Puèi res
Lo silenci
Pesug

Me senti
Dins la carrièra
Coma se i èri
En bàs
A la mercè
De qual ?

Una ombra se passeja
Qualqu'un
Un òme
Sabi pas qual
Se sarra
M'agacha

La pòrta
En cò mieu
Arriba
Es aquí
respiri pus
Dubrissi
Degús

Dins la classa

Dins la classa,

I a de burèus

Suls burèus i a los quasèrns

Dins los quasèrns

I a de frases

Dins las frases

I a de mots

Que s'escrivon

Amb lo gredon

Amb mon gredon

Dessenhi una selva

Dins la selva

I a un aubre

Dins l'aubre

I a una branca

Sus la branca

I a un aucelon

Que te canta

Ma cançon